

# Buna scola grischuna er senza cundecisiun

■ (anr/fa) **Cun 109:10 vuschs ha decis il cussegl grond da recumandar al suveran da refusar l'iniziativa «Buna scola grischuna – cundecisiun tar dumondas impurtantas da la furmaziun».**

Mez mars 2017 han represchentants dal comité d'iniziativa inoltrà duas iniziatives chantunalas dal pievel: «Buna scola grischuna – cundecisiun en dumondas impurtantas da la furmaziun» sa numna l'emprima e «Buna scola grischuna – cundecisiun tar ils plans d'instrucziun» la segunda. La cumissiun per furmaziun e cultura dal cussegl grond s'ha occupada da l'iniziativa costituziunala (cundecisiun en dumondas impurtantas da la furmaziun) e da l'iniziativa legislativa (cundecisiun tar ils plans d'instrucziun). La cumissiun, presidiada da *Cornelia Märchy-Caduff* (pcd, Razén), las ha predeliberadas per mauns dal parlament chantunal.

## La maioritad era da l'avis sco la regenza

En lur discussiun davart il cuntegn da las iniziativas «Buna scola grischuna» èn otg dals nov commembers da la cumissiun vegnids a la medema conclusiun sco la regenza. Mo *Roman Hug* (pps, Tschintg

Vitgs) era d'auter avis. Mintgamai cun otg vuschs han els decis da recumandar al parlament da refusar omaduas iniziativas. «Tant l'iniziativa costituziunala sco era quella legislativa avessan per consequenza che las cumpetenzas vegnissan spustadas da la regenza al cussegl grond ed a la finala a las votantas ed als votants», ha argumentà Märchy-Caduff, «quai resguarda la maioritad da la cumissiun sco fauss per fatgs classicamain operativs, sco p. ex. ils plans d'instrucziun.» Il parlament chantunal saja in organ strategic, ha ella ditg, «segns da dumonda dessi era tar la pratibitad sch'ina cumissiun dal cussegl grond e pli tard l'entir parlament stuessan tractar e deliberar in plan d'instrucziun da pliras tschients paginas che reglan detagls dal plaun operativ pli bass.» La maioritad dal cussegl grond era dal medem avis. Be represchentants da la fracziun da la pps han pledà per l'iniziativa dubla. Cun 109:10 vuschs ed ina abstenziun ha il parlament decis da recumandar a las votantas ed als votants da refusar l'iniziativa «Buna scola grischuna – cundecisiun tar dumondas impurtantas da la furmaziun». Oz, gievgia, tracta il cussegl grond l'iniziativa davart la cundecisiun tar plans d'instrucziun.



**Sco sulet commember da la cumissiun ha il deputà Roman Hug (pps Tschintg Vitgs) sustegnì l'iniziativa.**